

lis Gnovis

■ **PURÇÛS.** La storie di Elda contade de Comencini

E conte ancje la storie di Elda «Livia» Turchetti di Sià di Paulèt il romanç «Flashback» de regjiste taliane Cristina Comencini, publicât di «Feltrinelli». Lavoradore tal Cotonofici di Udin e partesane, Turchetti e fo sassinate a 22 agns, li de mont di Topli Uork, intant dal maçalzi fraticidiari di Purçûs, dai 7 di Fevrâr dal 1945. Pal critic di «Avvenire», Roberto Camero, chel di Elda al è salacor «il racconto più felicemente risolto» da l'opare de Comencini.

■ **DIMPEÇ.** Furlans tal Antartide

Ardito Desio di Palme e Ignazio Piuissi di Scuse a son i doi esploradôrs nostrans ch'a àn lassade la ferade plui grande te storie de esplorazion dal Antartide. La lôr contribuzion e sarà contade, fintremai tal mès di Decembar, da la mostre «Friulani in Antartide. Immagini dall'Archivio Desio», imbastide a Dimpeç, li di palaç Unfer, dal «Museu furlan di Storie naturâl», cul jutori dal «Museu gjeologic de Cjargne». Za dal 1956, Desio al veve tacât a programâ une spediçion viers dal Polo Sud, ma al fo fermât de scjarsetât di mieçs finanziariis. Cundut a chel, par vie dai siei studis e dai siei viaçs, dal 1974, al cjapà la «Antartic Service Medal» dal guvier dai Stâts Unîts. Impen Piuissi al fo un dai protagoniscj de spediçion alpinistiche e científiche di «Cai» e di «Cnr» dal 1968, cuant ch'al rivà a rimpinâ su vot pichis des cjadenis des monts Asgard e Olympus, e po ancje inte spediçion dal «Cnr» dal 1973.

■ **CJAMPARÒS.** Arbui e nêf te crisi climatiche



La fotografie di Sonia Fantini «Neve fresca», scattade te val Ba rtolo/Partalo/Wartalo tal Cumon di Cjamparòs/Zabnice/Saifnitz, e à vincût il prin premi dal concurs «Scatta il Bosco Pefc 2022», inmaneât dal sisteme di certificacion forestâl zenso. L'opare de Fantini e je stade scrutinade fra lis 400 fotografiis presentadis di 101 autôrs. Za dal 2019, l'artiste furlane e veve cjapât la medaie d'aur dal concurs «Pefc» cuntune foto dal lâd di Bordalie. Il concurs al à marcât ancje la cuistion de crisi climatiche, assegnant un ricognossiment speciâl a la fotografie «Polmone verde», scattade tal Cjadovri di Irene Toneatto. Lis miôr fotos dal premi a saran publicadis tal lunari di «Pefc» pal 2023.

■ **JELOVICA.** Gjestion strategjiche des Alps

Cence une gjestion strategjiche buine di armonizâ conservazion de nature, turisim e un svilup teritoriâl ch'al valorize la culture locâl, lis regions alpinis no cessaran mai altri di lâ al mancual. Cun cheste convinzion, sîs organizacions ch'a operin sul altiplan di Jelovica, tes Alps Juliis slovenis, a àn inmaneât un confront cu lis fuarcis impegnadis te gjestion dal Parc statâl dai Taurus Disore, te region austriache di Pinzgau. Intant dal zimulament, si à discorût di gjestion integrate, di comunicazion strategjiche, di orientament dai flus turisticis e di costruzion di un rapuart coret dal turisim cu la nature, la culture e la storie e di valorizazion dal patrimoni forestâl (www.cipra.org/it/jeloviza, www.rasora.si/projekt/jeloviza).

| | | | |
|------------|-----------------------|------------------------------------|--------------------|
| Miercus 26 | S. Evarist pape | Domenie 30 XXXI Domenie vie pal an | |
| Joibe 27 | S. Flurinç martar | Lunis 31 | S. Lucine vergjine |
| Vinars 28 | S. ts Simon e Jude | Martars 1 | Ducj i Sants |
| Sabide 29 | S. Ermelinde vergjine | Il timp | Bjel timp |



Il soreli
Ai 26 al jeve aes 7.39
e al va a mont aes 18.02.



La lune
Al prin Prin cuart.

Il proverbi
L'umign a cjaminin e lis montagnis a stan fermis.
Lis voris dal mès
E je ore di gjavà vie lis plantis muartis e lis lôr lidris, netâ il teren des jerbatis e svangjâ. Semenait bledis, ardielut, rucule, valariane.

Par saltâ fûr de crisi

La risorse dai Bens coletifs e l'ereditât di Paolo Grossi

«**V**oaltris, ch'ò incjarnâs une siele antropologjiche diferente e un mût diferent di frontâ il cantûn dal rapuart fra umign e Bens, us àn butâts di bande, incjantonâts te schirie dai boborôs di eliminâ e calcolâs fra i nemis de societât, ch'a meritin lucidâts». In face di cheste situazion, «Us racomandi di cûr di vè une psicologjie combative, di resistence cuintri da l'ignorance e da l'ostilitât cuintri di voaltris. Impensaisi di San Pauli: «Spem contra spem». Nudrît la vuestre sperance cuintri de disperazion che, magari cussì no, e risie di slargjâsi tal cûr di cui che nol è capît gran... Cjariaits di une psicologjie ative par puartâ indevant la grande funzion economiche e sociâl, storiche e etniche che us parten». L'apel di Paolo Grossi al torne a scjassâ lis cussienis e a interpelâ ducj chei ch'a rivin adore di capî il valôr straordinari e atuâl dai Bens comugnâi come risorse necessarie par saltâ fûr de crisi economiche, sociâl e ambientâl ch'e menace il Marimont.

A Grossi (1933-2022), ch'al à stât president de Cort costituzionâl e un dai plui innomenâts storicis dal Dirî, i à dedicât une comemorazion e une convigne internazionâl il Festival transconfinari da lis Economis transformativis e des Comunitâts teritoriâls, celebrât a Gurize e a Nova Gorica dai 14 ai 22 di Otubar (www.rethinkable.com). E une session interie de XXVIII «Riunion científiche» dal «Centro studi e documentazione sui Demani civici e le Proprietà collettive» di Trent, ai 18 di Novembar li de Università, e memorearà i meritis e l'ereditât dal grant inteletuâl florentin, muart ai 4 di Lui (www.usicivici.unin.it). Di chê strade dal confront gurizan, al à stât ricuardât il slas dal professôr e dal judis costituzionâl, autôr de opare fundamentâl «Un altro modo di possedere» - L'emersione di forme alternative di pro-



Paolo Grossi (a man drete), cul president de Republiche, Sergio Mattarella (www.quirinale.it)

A Gurize e a Trent, doi confronts su l'antropologjie e l'economie dai Dominis coletifs

prietà alla coscienza giuridica postunitaria» (tomade a stampâ dal 2017, dopo de prime edizion di 40 agns prime) e ancje la sò atenzion pal Popul dal Dominis coletifs dal Friul e dal Cjars. Paola Fabello dal Comitât frazionâl di San Marc di Merêt di Tombe, Michele Kovatsch, president de Vicinie «Nachbarschaft Pontafel» di Pontebe e de Clape dai Consuarts vicinai de Kanalta/Val Cjanâl/Kanalska Dolina, e Luca Nazzi de «Alleanza friulana Domini collettivi» a àn riferît lis peraulis ditis di Paolo Grossi a Boljunec/Bagnoli della Rosandra, intant de semblee de «Agrama skupnost» dal 2009 e a àn marcât la sò presince a Lubiane, tal mès di Fevrâr dal 2016, cuant ch'al fo invitat dal Ministeri sloven de Agriculture, dai Boscs e de Alimentazion par profondi la forme speciâl di proprietât rapresentade des Comunancis agrariis. Grossi, ispiradôr e partidant de Leç statâl 168 dal 2017, «Norme in materia di domini collettivi», in ogni forme e ocasion, al ribateve la specialitât e l'individualitât di «chel altri mût di possedi» rapresentât dai Bens coletifs, dulà ch'a son incjarnâts «doi primâts: chel de Comunitât sul individui e chel dal Ben sul individui», dulà

che i Dominis coletifs a calcolin la Comunitât come une cjadene di generacions mai çonçjate e dulà che i Bens, al ven a stâi la Tière, no son un ogjet dal podè dal proprietari, ma l'ogjet di une curie amorevul e de culture necessarie par rigjavâ il pan cuotidian. Cu la consequence di un rapuart Umign-Tière, «vital, ch'al tocje la vite de persone, intune suaze cosmiche». Parcè che la Tière, «pai Assets fondiariis coletifs, e je sore il dut ambient, tant a di armonie fra l'opare dal om e la nature».

Mario Zili

Messe par furlan

A Udin, la Messe par furlan e ven cjantade sabide ai 29 di Otubar a 5 e mieze soresere, li de capele «de Purità», dapruv dal domo (cun Radio Spazio che le trasmet sul moment). E compagnarà la celebrazion la corâl Meleretum di Merêt di Cjapitûl. Al cjantarà messe bons. M. Linossi.

Tradizions furlanis dal mès par cure di Mario Martinis

SANT SIMON

Otubar al complete il cicli des ativitâts agriculis. A chest pont de stajion ducj i prodots de tiere a vegnin puartâts a cjase e mitûts tal sigûr prin che lis zilugnis ju puedin vuastâ, par sei conservâts e trasformâts. Une volte, pe fin dal mès e veve di sei completade la ricostituzion des scortis de famee pal lôr sapient dosagio dilunc il lunc e frêt unvier. Cussì bisugnave meti vie ancje i foragjos per bestiis de stale e dal curtîl, ma ancje lens, torbe e cjarbon par scjaldâ i ambients. Fin a cualchi desene di agns indaûr, par fâ fieste pe fin des vendemis, in Friul si inmaneavin lis sagris de ue e intes fameis si faseve une grande mirinde o une cene (licôf), li che si clamavin ducj chei che vevin lavorât. Ancje la fin de racuelte de blave e il lâ a scussâ lis panolis a jerin moments par cjatâsi insieme in ligrie. Inte tradizion furlane e jere la fieste dal apuestul Simon a



sierà dal dut la anade agrarie (par chel la stagion si clamave sierade) cu la racuelte dai râfs e la mitude in bande dai argagns di lavôr. Ancje i proverbis a confermavin il moment e la vore: A S. Simon si gjave il râf e il raviçon e San Simon i imprescj tal cason. Cussì la fieste di Sant Simon e vierzeve il timp de polse dal unvier, tant che in cualchi vile si faseve sagre e si tignive mercjât dulà che si vendevin i plui bieci prodots de tiere apene cjapâts su e i imprescj di lavôr pe anade seguitive (vuè e je restade dome la sagre di Codroip). Cu la fieste di Sant Simon dut al veve di sei finit e sistemât parcè che a la fin di otubar dabon al començave il frêt. Ancjemò une volte i proverbis meteorologjics furlans cu la lôr antiche sapience e cun cetante savietât a confermavin il particolâr moment: S. Simon, manie e scufon, A S. Simon si tire sù la cjalce e il scufon e S. Simon passât, unvier jentrât.